

1 पतरस

1 पतरस कइ ओर ते जे यीसु मसीह कइ परेरित हंय, इ परदेसिन केर नाम, जउन पुन्नुस, गलतियां, कप्पुदुकिया, आसिया अउर विथूनियां मा तितर—बितर होयके रहत हुउ।²अउर बाप परमेसुर केर आगे केर गियान केर खातिर, आतमा केर पवित्तर करै केर आग्या मानइ केर, अउर यीसु मसीह केर लूहाम केर छिड़कै केर चुने गये हैं। तोहिका बहुत अनुगरह अउर सान्ती मिलत रहै।

परमेसुर केर बड़ाई करौ, वह ख्रिस्तीय जीवित आसा केर खातिर

³हमरे परभु यीसु मसीह केर परमेसुर अउर बाप केर धन्यबादु देउ, जउनु यीसु मसीह के मरे हुवां म ते जी उठै केर दुआरा, अपन अपार दया ते हमका जीवित आसा केर खातिर नया जनमु दिहिन हंय।⁴अरथात एकु अविनासी अउर स्वच्छ अउर अजर मिरास के खातिर।⁵जउनु तुम्हार बरे सरगौ म हइ, जेहिकी इच्छा परमेसुर केर समरथ ते, विसवासु केर दुआरा उइ उद्धार कइ खातिर आगे क समय म परगट होय केर हइ।⁶अउर ई खातिर तुम मगन होत हव, जदपि जरुर है कि अभै कुछु दिनन तक हर तरह केर परिच्छा केर खातिर उदास होय।⁷अउर ई खातिर है कि तुम्हार परखा भया विसवासु जउन आगी मा तपावइ क बाद नासु होय वाले सोनौ ते अधिक कीमती हइ, यीसु मसीह केर परगट होवै पर बहुतइ बड़ाई, महिमा, अउर आदर केर कारन उहिरहै।⁸उहिते तुम बिना देख परेम राखत हव, अउर अबै तो उनपै बिना देखे विसवासु करिके ऐसन आनन्दित अउर मगन होत हव, जऊन कहै ते बाहर अउर महिमा ते भरा हुआ हय।⁹अउर अपन बिसवासु केर बदले मा याने आतमन केर उद्धार पावत रहइ।

¹⁰ई उद्धार केर बारे मा उइ नबी लोगन बड़ी

दूढ़—ढाढ़ अउर जांच परताल करिन जवनिन उइ अनुगरह केर बारे मा जउन तुम पै होइ केर रहा, नबवूत करिन रहै।¹¹उइ ई बातन केर खोज करिन कि मसीह की जउनु आतमा उहिमा हइ, अउर पहिलेन ते मसीह की दुखों केर अउर उहिके बाद म होवै वाली महिमा की गवाही दिहिन। ऊ कऊनिव ओर अउर कइस समय केर इसारा करत हय।¹²उइ लोगन पै यहु परगट किया गवा कि अपन नाहीं मुला तोहार सेवा खातिर ई बातें कहत रहैं, जेहिका समाचारु अबै तुम कौ उइ लोगन ते मिला जउनु पवित्तर आतमा केर दुआरा जे सरग ते भेजे गवा, तुमहू क सुसमाचारु सुनाइस, अउर ई बातन क सरग दूत धियान लगाइ कइ देखन क इच्छा राखत हंय।

पवित्तर बनौ

¹³ई खातिर, अपन—अपन बुद्धि ते कमर कसि केर, अउर सचेतु रहिकै उइ अनुगरह कि पूरी आसा रक्खौ, जउनु यीसु मसीह के परगट होय पै तुमहू क मिलइ वाला हइ।¹⁴अउर मानइ वालेन बालक की नाई अपन जानकारी न होय के समय कि पुरान अभिलासा क नाई बनउ।¹⁵पर जइस तुम्हार बोलावय वाला पवित्तर हइ, वइसइ तुमहू अपन सबै चाल—चलन मं पवित्तर बनौ।¹⁶काहे ते कि अइसन लिखा हइ कि पवित्तर बनउ, काहे ते हमहू पवित्तर हन।

¹⁷अउर जबै तुम, हे बाप, कहिके उनहिन ते पराथना करत हउ, जउन बिना पच्छपातु हर एक का उहिके कामन खातिर नियाउ करत हइ, तौ अपन परदेसी होय के समय को डरिके बिताबै।¹⁸काहे ते तुम जानत हउ, कि तुम्हार निकम्मा चालु—चलनु जउन बाप दादा ते चला आवत है उहिसे तुम्हार छुटकारा चांदी सोने जइस नस्ट होय वाली चीजन ते नाहीं भयौ हइ।¹⁹ऊ तौ बिनु दोसु कइ अउर बिन

दागु कइ मेमने ते याने मसीह केर कीमती लहू ते भवा।²⁰उहिका गियान तउ जगत केर पैदा हुवै ते पहिले ते जाना जात रहै, मुला ई आखिरी दिनन मा तुमरे खातिर परगट भवा हइ।²¹जउन उहिके खातिर ऊ परमेसुर पै विसवासु करत हउ, जउन वहिका मरे हुअन मा ते जिलाइस, अउर महिमा दिहिस कि तुम्हार विसवासु अउर आसा परमेसुर पर होय।

²²यहि ते जबकि तुमहू भाईचारे के नाते बिनु कपट पिरेम के खातिर सच क मानइ ते अपन मनन क पवित्तर किहे हउ, तउ तन—मन लगाइ कइ एक दुसरे ते अधिकै पिरेम राखउ।²³काहे ते तुमका नासु होवै वालेन ते नाहीं पर अविनासी बीजइ ते परमेसुर केर जियत अउर सदा ठहरै रहै वालेन बचनन ते जनम पाए हउ।

²⁴काहे ते कि सबै परानी घास की नाई हइ, अउर उहिकी सारिउ सोभा घास के फूल की नाई हइ घास सूखि जाति हइ, अउर फूल झरि जात हइ।

²⁵मुला परभु क बचन जुगन तक बने रहि हइ। अउर यहै उहि समाचारु क बचन हइ, जउन तुइ का सुनाइन रहइ।

2यहिते सबहिन परकार कइ बैरु, भाउ अउर छलु अउर कपटु अउर डाहु अउर बदनामी क दूरि कइ कै।²नवा जनम लेवै वालइ बच्चन की नाई निरमल, आतमिक दूध की इच्छा करौ, जेहिते उहिके दुआरा उद्धार पावै कै खातिर बढ़तइ जाव।³जदी तुम लोगन परभु की किरपा क सवादु चखि लिहै हउ।

जेहिका मनइन निकम्मउ ठहरान उन्हीन को परमेसुर केर चुना भवा कीमती पाथर हय

⁴उहिके पास आइ कै जेहिका मनइन निकम्मउ ठहराइन, मगर परमेसुर केर नेरे वहि चुना हुआ अउर कीमती जीवित पाथर हइ।⁵तुमहू खुदइ जीवित पाथर की नाई आतमिक घर बनत जात हउ, जेहेते याजकन क पवित्तर समाजु बनि कइ, अइसन आतमिक बलिदानु चढ़ाउ, जउनु यीसु मसीह ते दुआरा परमेसुर क अपनावइ क जोग हइ।⁶यहि कारन पवित्तर सास्तरन म आवा हइ, कि देखउ, हम सिय्योन म कोने केर सिरे केर चुना हुवा अउर कीमती पाथर धरति हय: अउर जउन कउनव उइ पे विसवासु करि हइ, ऊ कउनउ रीति ते लज्जत न होई।⁷सो तुम्हरेइ खातिर जउनु, विसवासु करति हइ, उइ तो मूलवान हइ, पर जउन विसवासु नाई करत हइ, उनहुन केर खातिर

जउन पाथर केर राजमिस्तिरिन निकम्मा ठहराइन रहइ, वहइ कोने क सिरा होइ गवा।⁸अउर टेस लगाइ वाला पाथर अउर टोकर खाय वाली चट्टान होइ गइ हय, काहे ते उइ तो बचनु क न माने केर टोकर खात हइ, अउर एहि खातिर उइ ठहरावइ गए है।

⁹मगर तुमतो एक चुनो भयो बंस, अउर राज—पदाधिकारी, याजकन क समाजु, अउर पवित्तर लोगु, अउर (परमेसुर की) अपन परजा हउ, यहि ते जउन तुमहू क अधकारु मा ते अपन अनोखी जोति मा बुलाइस हइ, वहि क गुनन परगट करौ।¹⁰तुइ तो पहिले कुछु नाई रहउ, पै अब परमेसुर क परजा हउ, तुमरे ऊपर दायउ नाहीं रही मगर अब तौ तुमहू पर दया भइ है।

¹¹हे पियारों, हम तुम्हते विनती करत हइ, कि तुइ अपन आप क परदेसी अउर राही जान कइ, उइ संसार केर, अभिलासन ते जउन आतमा ते जुद्ध करति हइ, बचेइ रहौ।¹²दुसरे धरमन क मानइ वालन म तुम्हार चालु—चलन भलइ रहै, जेहिते जउन—जउन बातन म उइ तुम्हका बुरा काम करै वालन जानि कइ बदनामु करति हइ। उनहौ तुमरे भले कामन क देखि कै उनहिन केर खातिर किरपा—दिरिस्ती क दिन परमेसुर क महिमा करै।

सासक अउर हाकिमन केर सम्मुख आतमसमरण

¹³परभु केर खातिर मनइन क ठहराये गए सबही परबन्धकन केर अधीन रहौ, राजौ क यही कारन काहे ते उइ उन सबन पै परधान हइ।¹⁴अउर हाकिमन केर काहे ते उइ कुकरमिन केर दन्दु देइ क अउर सुकरमिन की परसंसा करइ केर खातिर उहिते भेजे गये हइ।¹⁵काहे ते परमेसुर केर इहै इच्छा हइ कि तुमहू भले कामन का करिके निरबुद्धिन लोगन कि अगियानता कि बातन क बन्द करि देव।¹⁶अउर अपने क सुतंतर जानउ, मुला ई सुवतंतरौ क बुराई क खारि आइ न बनाव, मुला अपने आप केर परमेसुर केर दासु समाझि कइ चलउ।¹⁷सबै केर आदर करौ, भाइन ते पिरेम राखौ, परमेसुर ते डरौ, राजा केर सम्मानु करौ।

¹⁸अरे सेवकों, हर तरहन केर भयन केर साथ अपन स्वामी केर अधीन रहउ। खाली उनहिन केर नाहीं जउन भलेइ अउर नरम स्वभाव केर है पर कुटिलनौ केर भी।¹⁹काहे ते अगर कोई परमेसुर क विचारु करिकै अनियाउ ते दुखउ उठावति हुए, कलेस सहति हइ, तउ ई सुहावनउ हइ।²⁰काहे ते अगर तुइ अपराधु करिकै घूसन की मारि खाइ केर अउर धीरजु

धरत हइ, तउ यहिमा कउन बड़ाई केर बातु हइ? मगर जदि भलेइ काम करिकइ दुख उठावत हइ, अउर धीरजु धरत हउ, तउ ई परमेसुर क भावति हइ।²¹तुम यहि केर खातिर बुलाएइ गये हव काहे ते मसीह तुम्हरे ई खातिर दुख उठाइ के, तुमका एकु आदरसु दे गवा हइ, कि तुमहूँ उहि केर चिन्हन पर चलौ।²²न तो उइ पाप किहिस, अउर न कबहूँ उहि केर मुखौ ते छलु जइस कौनेउ बातें निकरी।²³उइ गारी सुनिकै गारी नाहीं देत रहै, अउर दुख सहि केर केहु केर धमकिउ नाहीं देत रहै, पै अपन आप केर सचइ नियाउ करै वालेन क हाथन मा सौंपति रहै।²⁴ऊ खुदै हमार पापन केर अपन देहि पर लैके क्रूस पै चढ़ि गवा। जिहिस हम सबै पापन केर खातिर मरि केर धारमिकता कि खातिर जीवन बितावै, उहिके मार खाये ते तुमहूँ चगे भये हउ।²⁵काहे ते पहिले तुमहूँ भटकत भए भेड़न की नाई रहौ, मगर अब अपन परानन केर रखवाले केर अउर अध्यक्षउ नेरे फिर ते आइ गये हउ।

मरद अउर औरतन

3हे पतनियों, तुमहूँ अपन पतिन केर अधीन रहौ।²यहि खातिर की इनहिन मा ते कोऊ अइस होय, जउन बचन क मानत होय तबहूँ तुम्हार भै साथइ पवित्तर चालु चलनौ देखि कइ बिना बचनउ केर अपन आन मेहरारु केर चालु—चलनु ते खिचि जाइ।³अउर तुम्हार बनाउ सिंगार खाली दिखावइ क न होय, मुला बालन क गुहे केर, अउर सोने केर गहने, या कई तिना क कपड़न क पहिनै का।⁴मुला तुम्हार छिपा भवा अउर गुपुत मनईपन, नरम सुभाउ अउर मन केर दीनतउ कि न नासु होय वाली सजावट तै अच्छी तरह सजाय केर रहै। काहे ते परमेसुर की दिरिस्टी मा इहकी बड़ाई कीमत हइ।⁵अउर पहिलेन समय मा पवित्तर मेहरारु, जे परमेसुर प आसा राखति रही, अपने आप क इहै रीति ते संवारती अउर अपन—अपन पतिन केर अधीनइ रहति रहै।⁶जइस सारा अबराम कि आगयां म रहत रहै अउर उहिका स्वामी कहत रहै सो तुमहूँ अगर भलाई करौ अउर कवनेउ भय ते भयभीत न होउ तो वही की बिटउनी ठर रहौ।

⁷वही तिना हे मरद लोगउ, तुमहूँ बुद्धिमानी ते औरतन क साथइ जीवन बितावउ अउर नारी क अबला समझि कइ उहिका आदरु करउ, यहि समझि कइ कि तुम दूनौ जीवन कइ बरदान केर वारिस हउ, जेहिते तुम्हार पराथना रुकै नाहीं।

भले काम करइ केर खातिर दुख उठावति रहै

⁸आखिर मो सबै एकु मन, अउर भाईचारे केर पिरेम राखइ वालेन, अउर करुना ते भरा पूरा, अउर नरम बनौ।⁹बुराई केर बदले मा बुराई न करौ, अउर न गारी क बदले मा गारी देउ, पै इहके बदले असीसै देउ, काहे ते तुमहूँ असीस केर वारिस होयके खातिर बुलवाए गये हउ।¹⁰काहे ते जउन जियै क चाहत हँ अउर अच्छइ दिन द्याखा चाहत हइ ऊ आपनि जीभ क बुराई ते अउर अपन होठन क छलु केर बातन करै ते रोके राखै।

¹¹ऊ बुराई क साथु छोड़ै, अउर भलाई करै, उह मेलु—मिलापु क दूढ़े अउर उहिके जतन मा रहै।

¹²काहे ते परभु की आखँ धारमिक पै लागि रहति हँ, अउर उइ केर कान उनहीक बिनती म लागे रहत हइ, मुला परभु बुराई करै वालेन ते नाराज रहत हँ।

¹³अउर अगर तुइ भलाई करै मा उत्तेजित राहै तो तुम्हार बुराई करै वाला फिर कौन हँ? ¹⁴अउर अगर तुमहूँ धरमन केर कारन दुखउ उठावत, तउ तुम धन्य हउ, मगर वहिके डरावै ते मत डरौ, अउर न घबराउ।

¹⁵मुला मसीह क परभु जानि केर अपन—अपन मन मा पवित्तर समझौ, अउर जउनु कोउ तुमते तुम्हारि आसा केर बारे मा कछु पूछै, तउ उहिका जवाबु देइ का सदा तैयार रहउ, मुला नरम अउर भय केर साथै।

¹⁶अउर विवेकउ केर सुद्धइ राखौ, ताकि जउनी बातन केर बारे मा तुम्हारि बदनामी होति हइ, उनहिन क बारे म उइ जउन तुम्हरे मसीही भले चालु चलनौ क अपमानु करत हइ, लज्जित होय। ¹⁷काहे ते जदि परमेसुर कइ यहै इच्छा होय कि तुइ भलाई करिन केर कारन दुख उठावति हउ, तउ ई बुराई करैन क कारन दुख उठावै ते उत्तमु हइ।¹⁸यहि ते मसीह ने भी, यानी अधरमियन केर खातिर धरमिन पापन कइ कारन एकु बारु दुख उठाइस जेहिते हमहूँ क परमेसुर क नेरे पहुँचाइ देय, उइ द्याह केर भाव ते घात किया गवा मुला आतमा केर भाव ते जियावा गवा।¹⁹उइ मा ऊ जाइ केर बन्दी आतमन मा परचारु किहिसि।

²⁰जउनिव उइ बीते समय मा आगया न मानिन जबै परमेसुर नूह केर दिन मा धीरजु धरि केर रुकि गवा, अउर ऊ जहाज बनत रहा, जेहिमा बइठ केर थोड़े लोग यानी कोई आठ परानी पानी केर बल ते बचि गये।²¹अउर उइ पानी केर दिरिस्टन, याने बपतिसमा,

यीसु मसीह केर जी उठइ ते, अब तुमहक बचावत हइ। जेहिते देह केर मइल क दूर करइ क नाहीं हइ मगर सुद्ध विवेक ते परमेसुर केर अधीन म हुइ जाइ

का मतलब है।²²उइ सरग मा जाइ कइ परमेसुर केर दहिने ओर बैढ़ि गवा, अउर सरग दूत अउर अधिकार राखइ वालेन अउर समरथ राखइ वालन उहि केर अधीन कइ दिहिन है।

परमेसुर केर खातिर जियत

4 यहि ते जबै मसीह देह लइ केर दुख उठाइन तउ तुमहूँ उइ मनसा केर धारन करि केर हथियारु बांधि लेउ, काहे ते जउन देह मा दुख उठाइस वहै पापन ते छुटकारा पाय गवा।²जाहे ते आगे कि समय मा अपन बाकी देह थारिउ जीवन मनइन कि अभिलासन केर मुताबिक नाहीं, पर परमेसुर की इच्छा ते बिताउ।³काहे ते दुसरे धरमन मानइ वालेन केर इच्छा मुताबिक काम करै क, अउर लुचपन की बुरी अभिलासनु, मतवलापनउ लीला, कीरियनउ, पियक्कड़पनउ, अउर धिरना वाली मूरति पूजनउ मा जेहि तक हमहूँ पहिल समय गवायेन ऊ बहुत हुइगा।⁴ई ते उइ अचरज करत हई, कि तुम अइसन भारी लुचपन मा उनहुँ क साथ नाहीं देत, अउर इहते उइ तुमका बुरा भला कहत हई।⁵पर उइ उहिका जउन जीवित अउर मरे हुएन क नियाउ करैक तइयार हईय, लेखा देइ हई।⁶काहे ते मरे हुएन का सुसमाचार यहि ते सुनावा गवा, कि देह राखे वाले मनइन केर मुताबिक उनहुँक नियाउ होय, मुला आतमा म उइ परमेसुर केर मुताबिक जियत रहै।

⁷सबै बातन क अन्तु फौरन होय क हैं, यहि ते संजामी होइ केर पराथना केर खातिर सचेत रहउ।⁸अउर सबन म सरसेठ बसत इ हई कि एक दुसरे ते अधिक पिरेम राखउ, काहे ते पिरेम अनेक पापन क ढाँकि देत हई।⁹बिनु कुड़कुड़ाए एकु दुसरेन की पहुनाई करै।¹⁰जेहिका जउन बरदानु मिला हई, उइ वहिका परमेसुर केर अनेक परकार केर अनुगरह केर भलो इ भन्डारिन की नाई एक दुसरे की सेवा म लगावै।¹¹अउर कोऊ बोलइ तो अइस बोलइ जइस परमेसुर क बचन हवै। अगर कोऊ सेवा करै, तउ उइ सकती ते करै जउन परमेसुर देत हई, जेहि ते सब बातन मा यीसु मसीह केर दुआरा परमेसुर की महिमा परगट होय, महिमा अउर सामराज्य जुगन जुगन तलक उइ की है। आमीन।

मसीह बनइ खातिर दुखु उठाव

¹²हे पियारो, जउनु दुख केर आगी तुम्हरे परखन केर खातिर तुम्हरे मा धधकिहै यहि ते ई समझि कइ चकित न होउ, कि कउनउ आनोखी बात तुम पै बीत

हई।¹³मुला जइसे जइसे मसीह केर दुखन मं सहभागी होत हउ, आनन्द करौ, जेहि ते उहि की महिमा केर परगट होत समयौ भी तुइ आनन्दित अउर मगन रहौ।¹⁴फिर जदी मसीह क नाम केर कारन तोहार निन्दा की जाति हई, तो धन्य हउ, काहे ते महिमा केर आतमा, जउन परमेसुर की आतमा हई, तुम्ह पै छाया करत है।¹⁵तुममा ते कउनउ हत्यारा या चोर या कुकरमी होय, या पराये कामन म हाथु डालइ केर कान दुख न पावै।¹⁶मगर मसीही होवै केर कारन दुख पावै, तउ लज्जित न होय, मुला इहै बात की खातिर परमेसुर की महिमा करै।¹⁷काहे ते ऊ समय आइ गवा हई, कि पहिले परमेसुर केर लोगन क नियाउ किया जाय, अउर जबैकि सुरुआत हमहिन ते हुइहै तो उइ का कौनु अन्त होई, जउन परमेसुर केर सुसमाचार क नाहीं मानत।¹⁸अउर जदी धरमी मनई कठिनाई ते उद्धार पइहै, तौ भगती ते दूरि अउर पापिन का कउन हाल होई?

¹⁹यहि ते जे परमेसुर कि इच्छा ते दुखु उठावत हई, उइ भलाई करत भये, अपन—अपन परानन क विसवासु योग सिरजनहार केर हाथन मा सौंपि देई।

पुरनियन अउर जवान लोगन केर बारे मा

5 तुम मा जउन पराचीन हई, हम उनहुन की नाई पराचीन अउर मसीह केर दुखन क गवाह अउर परगट होइ वाली महिमा मा सहभागिउ हुई केर उनहुन क इहु समझाइत हई।²कि परमेसुर केर उइ झुंड क, जउन तुम्हरे बिच्चा मा हई, रखवाली करउ अउर ई दबाउ ते नाहीं, मगर परमेसुर केर इच्छा की मुताबिक खुसीय ते अउर नीच कमाइ क खातिर नाहीं, मुला मन लगाइ के।³अउर जउन लोग तुमका सउपिन गये हई, उन पै अधिकार न जताव, वरन् झुंड केर खातिर मिसाल बनौ।⁴अउर जबै रखवालेन क मुखिया परगट होई तब तुमहुँक बड़ाई क मुकुट दियो जाई, जउन मुरझाइ का नाहीं।⁵अरे नवयुवकों, तुमहूँ पुरनियन केर अधीन रहौ, वरन् तुम सबै एकु दुसरे की सेवा क खातिर दीन होय केर कमर बांधेइ रहउ, काहे ते परमेसुर अभिमानिन केर समानउ करत हई, मुला मन केर दीनन पै दया करत हई।⁶यहि ते परमेसुर केर बलवान बाहन केर नीचेइ दीन होइ केर रहउ। जेहि ते ऊ तुम कौ उचति समय पै बढ़ावै।⁷अउर अपन सबहिन फिकरउ क उहि पै डारि देउ, काहे ते उहिका तुमरो धियानु हई।

⁸सचेत रहउ अउर जागत रहउ, काहे ते तुम्हार विरोधी सैतानु गरजै वाले सेर की नाई ई खोज म

रहत हइ, कि केहिका फारि खाय। ⁹विसवासु म मजबूत हुइ कै, अउर यहि जानि केर वहिका सामनउ करउ, कि तुमरे भाई जउन संसार मा है, यही तिना दुख भुगतत रहत हइ।

¹⁰अब परमेसुर जउन सबै अनुग्रहन का करइ वाला हइ, जेहिते तुम्हौ क मसीह मा अपन असीम महिमा केर खातिर बुलाइस, तुम्हार थोड़िय देर तलक दुख उठावइ केर बाद खुदै ही तुमका सिद्ध, थिर अउर बलवन्त करिहै। ¹¹वहिकै सामराजु जुगन—जुगन तलक रहै। आमीन।

आखरी अभिवादन

¹²हमहूँ सिलवानस केर हाथे जेहिका हम विसवासु योग भाई समझति हइ, थोरै म लिखि केर तुमका समझाइन है। अउर ई गवाही दीन हइ कि परमेसुर क सांचउ अनुग्रह यहै हइ, वही मा थिर रहउ।

¹³जउन बाबुल म तुमरी नाई चुने हुए लोगन हय ऊ हउर हमार बेटवा मरकुस तुमका नमसकार कहत है। ¹⁴पिरेम ते चुम्बनु लइ—लइ केर एक दुसरे क नमसकार करउ। तुम सबन क जउन मसीह म है, सानती मिलत रहै। आमीन।